



Kamis, 24 September 2021

Ogen: Kejadin 2:15-17



Itamaken Alu Tujun Si Tepat



Kerina siitepa Dibata lit tujunna. Kerina itamaken Dibata ibas doni enda sue ras cibalna pe jelas nge gunana. Ertina kai pe siilakoken Dibata jelaskal ingan, guna ras tujunna. Ibas renungenta enda ituriken maka Dibata namaken manusia sienggo itepaNa e i Peken Eden guna njagai ras ngusahaisa. Njagai doni enda, gelah tetap mehuli bagi Dibata enggo njadikenca alu seh kal ulina. Janah ngusahaisa gelah kerina erguna sada ras sidebanna. Bagi nina 'simbiosis mutualisma' sada ras sidebanna saling membutuhkan dengen kerina iuntungken guna 'keberlangsungen' tinepa Dibata enda. Jelas kal tujun Dibata namaken mansuia ibas peken Eden e.

Terdauhen ipedahken Dibata kai si arus ilakokenna dengen kai si la banci ilakokenna. Jelas kal pedah Dibata e, kerina buah batang kayu banci ipan seakaten buah simereken pemete e la banci ipan, adi pan mate me ia. Kepeken mansuia e la ngasup njagai tinepe Dibata, tinepa sideban termasuk dirina selaku tinepa pe la terjagina. Sura-surana, ipanna buah e janah tinepa sideban amin iusahaina asa ngasupna guna kepentingenna jine. Lanai iukurina kegeluhen tinepa sideban. Jelaskal sura-sura ras tujun Dibata nepa doni enda rikut ras manusia. Tepat kal itamaken Dibata manusia ibas peken Eden, sikap kal enggo ibahan Dibata kerina siiperlukenna tapi la kepe terjagina kepercayaan Dibata e.

Arah renungenta enda, ipersingeti dengen iajuk kita, rusalah kita njagai kepercayaan Dibata e man banta. Kerina kita enggo icibalken Dibata ibas ingan si pas. Perbulangenta, ingan ras teman si tepat man banta, setialah. Anak-anakta icibalkenna ibas jabuta, kelengi ras jagai alu mehuli. Dahin ras pelayanenta labo salah Dibata merekenca banta, tutusilah.